

## ADFENT 3

SEFFANEIA 3:14-20; ESEIA 12:2-6;  
PHILIPIAID 4:4-7; LUC 3:7-18

---

---

### ● Gweddi agoriadol

Dyma'r Adfent, tymor disgwyl. Mewn cartrefi drwy'r wlad, saif cardiau Nadolig ar silff-ben-tân a sil ffenest. Addurnwyd coed yr ŵyl â thinsel a chlychau, a phlant yn dyfalu pa anrhegion fydd dan y goeden eleni.

Ddwy fil o flynyddoedd yn ôl, disgwyliai cenedl mewn gobaith wrth wrando ar broffwyd o'r enw Ioan yn sôn am yr un oedd i ddod, a dechrau eu paratoi eu hunain i'w gyfarfod.

Dduw Dad, daeth dy was Ioan Fedyddiwr gyda galwad am edifeirwch a bywydau wedi'u trawsnewid. Llanwyd y rhai a glywodd â disgwyliadau, yn disgwyl am y Meseia, ond wedyn yn methu sylwi ar ei ddyfodiad. Yr Adfent hwn, boed i ninnau gael ein llenwi â disgwyliadau wrth i ni ddathlu yr anrheg mwyaf i gyd – dy Fab, Iesu Grist.

### ● Moliant

Llawenhewch yn yr Arglwydd bob amser!  
Gwaeddwch ei enw,  
achos mae Duw gyda ni;  
mae ein Duw gyda ni,  
Duw ein hiachawdwriaeth,  
yr unig un y llwyr ymddiriedwn ynddo.

Llawenhewch yn yr Arglwydd bob amser!  
Gwaeddwch ei enw,  
achos Duw yw ein Tad  
sy'n dod â ni adre  
heibio nentydd o ddŵr bywiol  
lle na sychedwn mwyach.

Llawenhewch yn yr Arglwydd bob amser!  
Gwaeddwch ei enw,  
achos mae'n ein harwain ar ein ffordd,  
a'n galluogi  
i fod y bobl  
y'n bwriadwyd.

Llawenhewch yn yr Arglwydd bob amser!  
Gwaeddwch ei enw,  
achos mae Duw gyda ni;  
mae ein Duw gyda ni.

● **Cyffes**

Maddau i ni, Arglwydd;  
pobl grwydrol ydym ni  
sy'n penlinio o'th flaen yn awr  
gan ddod â'n gweddïau  
a'n ceisiadau at dy draed  
pan fyddwn dy angen,  
ac wedyn yn mynd ein ffordd ein hunain  
pan yw'r amserau yn dda  
a bywyd yn ymddangos yn hawdd.

Maddau i ni;  
dysga i ni dy lwybrau,  
er mwyn i ni dy ddilyn di  
ddydd ar ôl dydd,  
mewn heulwen a glaw,  
llawenydd a thristwch,  
a mwynhau dy gwmni  
o eiliad ein deffro  
nes gosod ein pennau i orffwys.

● **Diolch**

Ti yw'r Tad  
sy'n croesawu adre  
yr afradlon pell-grwydrol.

Ti yw'r Tad  
sy'n paratoi gwledd  
pan fydd eraill yn cerdded i ffwrdd.

Ti yw'r Tad  
y mae dy gariad yn ymestyn  
y tu hwnt i'n meddyliau a'n teimladau.

Ti yw'r Tad  
sy'n nabod ein calonnau,  
ac eto yn ein caru fel yr ydym.

Ti yw'r Tad  
yr ymddiriedwn yn ei air,  
nad oes gennym ofn pan fyddwn yn ei freichiau.

Ti yw'r Tad  
y mae ei gyffyrddiad tyner  
yn cyfannu'r ysbryd clwyfus.

Ti yw'r Tad  
y ganed ei unig Fab  
er mwyn iddo farw.

Ti yw'r Tad  
y dygwn iddo  
ein diolch dwfn heddiw.